

الفاجومى

مصارفانى

- وزير الشؤون الاجتماعيه عزمنى على فنجان قهوه في مكتبه وأصبحت موظف في السكه الحديد في الرقازيق.
- نقلت إلى مصلحة البريد وتم توزيعي على أبو زعل.
- نقلت إلى ورش النقل الميكانيكي ومنها إلى سجن أرميدان ١٩٥٩.

■ ■ ■

obseikan.com



فى شارع القصر العينى وفى مبنى وزارة الشؤون الاجتماعيه طوابير من العمال يقفون أمام الشبابيك.. ولما جه دورى سألتنى موظف الشباك:

- معاك ما يثبت إنك كنت بتشتغل فى معسكرات الجيش الإنجليزى؟

قدمت له جريده المصرى عدد ١٢ / ١٠ / ١٩٥١.

بص فيه بقرب وقال لى:

- ده تقدمه لأهل العروسه.. معاك ورق رسمى؟

قلت له:

- أنا اللي انتقال اسمى فى نشره الأخبار ضمن....

قاطعنى:

- إنت حتحكى لى قصه حياتك؟ يا أستاذ ماتعطلناش.. اللي بعده.

ولقيتني ضايح فى شوارع مصر المحروسه.. أروح فين؟ لأ أجي متين.. أعمل

إيه؟! دنا حتى ما قدرش أرجع تانى وسيد الخولى هناك.

وفجأه على رأى أحمد القصير تذكرت بعثة جريده المصرى فمكذبتش خبر

سألت عن جريده المصرى قالولى جنبك أهه فى شارع القصر العينى.. رحت على

هناك سألت عن الأستاذ محمود شكرى قالولى مسافر السويس هو وعلى

الديروطى.

- طب الأستاذ على جمال الدين الطاهر.

قالولى فى مكتبه دخلت عليه الراجل عرفنى وقابلنى بالأحضان حكيت له خيبتى

ضحك وطلب لى القهوه وكتب لى جواب حطه فى ظرف مفتوح باسم «عبد الفتاح

حسن باشا - وزير الأوقاف».. وقال لى:

- حتروح تسلم الجواب ده فى مكتب الوزير وتشوف حيعملوا معاك إيه وتيجى

تقول لى.. أنا مش ح أروح أنا مستنيك.

كانت الساعه حذاشر بالليل ضحكت وقلت له:

- حستنى هنا لكره؟

قال لى:

- لأ.. روح دلوقتى الوزاره فاتحه والوزير هناك.

وكانت مقابله الوزير لى هى المفاجأه.. أنا سلمت الجواب لمدير المكتب وفكرت
أمشى وأجى الصبح وفوجئت بعبد الفتاح حسن باشا بمجرد دخول مدير المكتب عليه
خارج لاستقبالى وهو بيقول لى:

- أهلاً بالبطل.

وخدنى من إيدى على جوا المكتب شربت معاه فنجان قهوه وأثناء شرب القهوه
سألنى:

- تحب تتوظف فين؟

قلت له:

- أنا من الزقازيق.

وفى خلال خمس دقائق انكتب الجواب ووقع عليه الوزير وصرف لى مرتب
شهر كامل وقال لى:

- إنت من النهارده موظف فى السكه الحديد فى الزقازيق.

ودى كانت نهاية مرحله وبداية مرحله جديده فى حياة الفاجومى.



المحترم اللى قال «الغريبال الجديد له شدّه» قال نص الحقيقه وساب الحدق يفهم
النص الثانى اللى هو إن الغريبال لما بيقدم بيرهرط ويترخى ويبقى زى ندل ابن عروس
ميت وهو حى ماحد يحسب حسابه زى الترمس النى.. حضوره يشبه غيابه.

وهو دا بالظبط اللي حصل لعمال الكنال التمانين ألف إياهم.

الأول استقبال الأبطال بالأحضان يا بلدنا.. والكتف دا زاد والكتف دا ميه
والوداع لمن عاش يا غربه.. البلد بلدنا والحكم حكمننا.. والنيل امبو.. وحشرب منه
كلنا.. وعمار يا مصر يام الفدائيين والعمال الوطنيين.

وفجأه ضربت الخيانه ضربيتها والضربه جت في الصميم.. حرقوا القاهره..
وخلوا النحاس باشا يعلن الأحكام العرفيه بنفسه.. وبعدين طردوه عشان يستفردوا
بالشعب المصرى ويأدبوه.. قفلوا الصحف الحره واعتقلوا فرسان القلم وقبضوا ع
الغدائيين.. واعتبروا إلغاء معاهده ١٩٣٦ وما ترتب عليه.. لاغى! يعنى إحنا التمانين
ألف عامل كلنا الأوطنه واتشعلقنا في الحبال الدايبه.. واللى أكد الظن ده سوء
المعامله.. مش من الإدارة وبس لأ.. من زملائنا العمال الأصليين.. فهموهم إن احنا
جايين ناكل لقمتهم.. وبدأنا نسمع تعبير جديد من رؤسائنا المصريين.. اسمه العمال
الزايدين عن الحاجه.. إحنا يعنى بقينا زايدين عن الحاجه وجايين نخطف اللقمه
الحاف من بق عمال الحكومه.. وفي الزقازيق قال الحاج أحمد حنفى ملاحظ قسم
عربات السكه الحديد في الزقازيق قال لى:

- انتوا رححتوا ولا جيتوا شويه صبيع هفأ.. ختتوا بلدكوا ورحتوا اشتغلنوا عند
لنجليز ولما عرفتوا إن لنجليز حيخرجوا جيتوا تقرفونا وتزاحمونا في أكل عيشنا.

قلت له:

- إنت متأكد إن لنجليز حيخرجوا؟

قال لى:

- الكلام في السياسه ممنوع هنا.. اتفضل روح شغلك.

يا ولاد الكااالب.

طيب يا صبر طيب.

كنا بنتلم كلنا فى بيت عيد زميلنا وماكانش لنا كلام إلا فى موضوع الزايدىن عن الحاجه.. بعضنا قرر العوده إلى معسكرات الانجليز والبعض الثانى ودا الأغلبيه رفض الفكره من أساسها ويشده.

لكن التصعيد فى سوء المعامله والتصريحات الرسميه ضد عمال الكنال زادت بشكل ملموس وسببت لنا القلق والتوتر ودا انعكس على علاقتنا حتى ببعض.

صرخ عبد المطلب فى وشنا واحنا قاعدىن عند عيد:

- كلب ابن كلب حيكلمنى عن الوطنيه والكلام الفارغ ده ح اضربه باللى ف رجلى كفايه كلام بقى.. بيوتنا خربت وعيالنا جاعت واتشردنا والآخر طلعتنا زايدين ع الحاجه.



وذات صباح جميل زى ما بيقولوا فى الروايات.. صحيت مصر على صرخه المولود اللى شق جوف الضلمه زى الأدان.. الله أكبر.. الله أكبر.. الملك لك يا صاحب الملك.. ولا ملك إلا لك.

وصلت ورشه عربيات السكه الحديد لقيت العمال متجمعين حوالين الراديو ويستمعوا بيانات حركه الجيش.. كانت الفرحة مالينه القلوب وطافحه ع الملامح.. كله كان فرحان.. عمال كنال.. وعمال أصليين.. كل المظلومين كانوا فرحانين حتى عبد العزيز أخويا كان فرحان.. تصوروا!



مؤقتاً انحلت مشكله عمال الكنال لكن فضل تعبير الزايدىن عن الحاجه ينغص علينا حياتنا بالنهار ويحرمننا لذيد المنام بالليل.. وأخيراً تم التخلص من حوالى تسعين فى الميه من عمال الكنال وتم توزيعهم أو تشتيتهم فى بلاد الله.

أنا شخصياً تم تشتيتى إلى مصر المحروسه فى مصلاحه البريد اللى شتتني على أبو زعبل واشتغلت هناك طواف وكانت دى تانى مره أزامل حمار فى الشغل.. المره

الأولى كانت في تفتيش الملك زاملت الحمار مجدى والمره دى زاملت الحماره
عزیزه اللى كانت عارفه طريق صناديق البريد فى العزب والكفور والبلاد وأنا ما
على إلا أخذ بصمه الختم من كل صندوق وتوزيع الجوابات على أصحابها واستلام
الجوابات المرسله من صناديق المنطقه وأخيراً اتشتت إلى ورش النقل الميكانيكى ودى
كانت آخر جهه حكوميه أشتغل فيها لأنى خرجت منها على سجن أرميدان سنه
١٩٥٩ متهم بالتزوير.. إزاي؟



الرزق يحب الخفيه وورش النقل الميكانيكى فيها حوالى ٨٠٠ عامل وموظف..
وكلهم بيخرجوا ساعه الضميره ساعه ونص للغدا والراحه.. حيروحوأ فين؟

حوالين الورش مجموعه من الأكشاك الخشبيه اللى بيعس سندوتشات واللى
بيعمل شاي وقهوه واللى بيعس جرايد وظروف جوابات وعرضحالات دمغه وكله
بيبيع شكك وكله بيستنى أول الشهر وشده المنافسه بينهم خير وبركه على رأى المثل
«اتخنقوا الحماره من حظ الركيه».. فى أول الأمر كنت باطلع ساعه الغدا أقعد فى
أقرب كشك.. لكن صديقى سَمَنَطَرُ قال لى:

- إنت ليه بتقعد عند الرجل المعفن ده؟

قلت له:

- مش فارقه.

قال لى:

- لأ..معفن عن معفن يفرق.

قلت له:

- يفرق إيه؟

قال لى:

- أولاً أم جميل حاجتها أنصف وبعدين غلبانه بترى أيتام وبعدين وده المهم بتسلف فلوس.

قلت له:

- لاء.. كده تبقى فرقت شويه.

قال لي:

- السبعين قرش بجنيه.. يعنى الثلاثين قرش دول هما الحسنه المستخيه.

قلت له:

- وإيه تانى؟

ضحك وقال لي:

- المسأله التانيه دى إنت وشطارتك بقى.. ومين عارف.. الركع النصيب.

قلت له:

- إنت بتتكلم عن إيه؟

قال لي:

- إطلع من دول يا لئيم.. بقى يعنى إنت ما سمعتش عن نوال بنت أم جميل؟



صديقى سمنظر عامل قديم فى ورش النقل الميكانيكى جمعنا سوا حب النادي الأهلى وكنا بنزوغ يوم ماتشات الأهلى ونروح الملعب سوا.. ونخرج من الملعب على بيتهم فى عابدين وكان هو ساكن مع أمه فى أوضه تحت السلم وكان إنسان مخلص ومريح زى ما بيقولوا صاحب صاحبه.. أول مره رحى معاه عند أم جميل ساعه الغدا قدمنى ليها:

- أنا جايب لك أجدع راجل فيك يا نقل يا ميكانيكى.. الأستاذ نجم رئيس الوارد والصادر فى الأرشيف (مافيش حاجه اسمها كده خالص).

كانت مرا فلاحه والهم كبرها.. كانت في حدود الأربعين لكن تشوفها تقول
الخمسه والخمسين.. بصت لى من فوق لتحت وقالت لسمنظر:

- باين عليه ابن حرام زيك.

ضحك وقال لها:

- أمال أنا مصاحبه ليه؟!

قالت له:

- حتتغدوا؟

قال لها:

- على حسابى.. ذا راجل خيره علىّ (ماحصلش).

قالت له:

- طب استنوا زمان نوال جايه بالгда والنهارده الغدا علىّ.

ماكملتش الكلام إلا ونوال جايه وشايله شنطه قماش بإدين خشب فتحتها
وبدأت تطلع منها الحلل والعيش والطرشى.. إلخ.

هى منهمكه فى تحضير المسائل وأنا عيني مانزلتش من عليها.. حاجه سبحان
الخلق العظيم.. شكل زهره القرنفل وحراره زيه.. لكن الفقر كاسر نفسها ومدبل
الأنثى جواها.. كانوا عاملين محشى كرنب وأنا ضعيف جداً قدام محشى الكرنب..
فاعتبرت إن دا نوع من التكريم الشخصى ونزلت ع المحشى حتتك بتتك بشكل لفت
نظر أم جميل فقالت لى:

- حيلك شويه، إقت قايم من فم عيا؟

قالت لها القرنفلايه:

-- سيبه ياكل يامه بألف هنا وشفأ.

قلت لها:

- إنتى الليّ عامله المحشى ده يابت؟

ضحكت وقالت لى:

- لو عجبك أعمل بكره تانى.

قالت لها أمها:

- ياخى عملك أسود إنتى وهو.

قالت لها:

- بعد الشر عليه.. إن شاء الله الليّ يكرهوه ويتمنوها له.

إدبني عقلك يا محترم؟ أنا عقلى شت من مطرحه.. رحى ماسك صباع محشى ومديهولها فى بقها.. راحت واكلاه ومناولانى صباع فى بقى.. بصيت على سمنظر لقيته مبتسم وخجلان لكن ملامحه كلها سعادته.

وقالت أم جميل وهى مذهوله:

- شوف البت بنت الكلب بتأكله فى بقه واحنا قاعدين.

قال لها سمنظر:

- ياللا بينا نسيب لهم الجو أحسن كده بقى شكلنا زى العوازل الأردال.

قالت له:

- حتى إنت كمان يا سمنظر؟ يا خيبه أملى فيك!

عرفت بعد كده إن أم جميل متجوزه الأسطى محمد المصرى سرّاً وإنه ماكانش موافق على علاقتى بنوال لأنها ماجاتش عن طريقه وذات ليله عزمتها على السينما لكن أمها رفضت إنها تخرج معايا وقالت لى:

- لازم تستأذن م الأسطى محمد.



وقالت نوال:

- ليه؟ هو كان أبويا؟

قالت لها:

- اللي مالوش كبير بيشتري له كبير ياروح أمك.

قالت لها:

- وأنا كنت اشتريته إمتى ده؟

المسأله اتطورت أكثر بسرعته.. وأنا بصراحه ماكانش عندي مانع إنى أتكلم مع الأسطى محمد المصرى باعتباراه رب الأسره لكن نوال أصرت على الرفض واعتبرت إن مجرد تفكيرى فى الموضوع بالشكل ده يعتبر انتقاص من رجولتى اللي هى بتعتز بيها! مش عارف ليه؟!

كان فيه إداره عموم الورش مجموعه من السعاه والفراشين كان أبرزهم يوسف ساعى المدير.. دمه خفيف جداً وعلاقته بالموظفين والمهندسين خاصه جداً.. دا بياخد منه حشيش ودا بياخد منه عطاره لزوم الباه.. ودا بيطلب منه سباك كويس ورخيص وابن حلال.. ودا بيكلفه بالبحث عن شقه يجوز فيها بنته ولا ابنه.. وهكذا.. وغير كده وكده عنده أسرار العلاوات والتنقلات والمؤامرات.

يوم جمعه نزلت على سمندر فى عابدين عشان نتغدى ونروح الماتش لقيت يوسف هناك أول ما شفىنى قال لى:

- أهلاً بعريس الهنا.

قال له سمندر:

- يسمع منك ربنا.. عايزين نلمه بقى يابو حجاج.. كلام الناس كتر.

قال لى:

- إنت لك شوق فى نوال؟

قلت له:

- إنت إيه رأيك؟

قال لى:

- يازين ما اخترت.. دى بنت يتيمه وغلبانه والمثل بيقول «خدوهم فقرا تشحتوا سوا».. وضحك.

قلت له:

- العين بصيره.. والإيد قصيره يابو حجاج.

قال لى:

- ففتح مخك تاكل ملبن يا أستاذ.

قلت له:

- يعنى إيه؟

قال لى:

- يعنى الدنيا اللى إنت شايفها قدامك دى.. كلها كذب فى كذب كل ما تعرف تكذب كل ما تقدر توصل وتعيش على شوقك.

ضحك سمنظر وقال لى:

- ماتمشيش ورا يوسف ليسوِّحك.

بعد يومين عزمنى يوسف ع العشا فى بيته وأثناء ما احنا ماشيين قال لى:

- تعالى نعمل مذكرة فى قسم الضاهر.

قلت له:

- مذكرة إيه؟

قال لى:

- إنت مش عايز تتجوز نوال؟ إعمل اللى ح قولك عليه بدون سؤال.

ودخلنا قسم الضاهر وعملنا مذكرة بفقد بطاقتى الشخصيه.. وتانى يوم خدنى

يوسف ورحنا محل في شارع الجمهوريه على ما أذكر وصرفنا استمارتين أقمشه بمبلغ ١٤٠ جنيه.. وخذ يوسف البضاعه ومشى تانى.

يوم قابلنى فى الشغل وادانى ثلاثين جنيه ودا أكبر مبلغ مسكته فى حياتى وكررنا الحكايه دى ثلاث مرات من محلات مختلفه.

ويوم خميس كنت رايح ليوسف فى بيته اللى فى الشرايه حوالى الساعه ٨ مساء وفوجئت وأنا طالع السلم بمجموعه من رجال البوليس نازلين وأول ما شافونى سألونى:

- إنت عايز مين هنا؟

قلت لهم:

- عايز يوسف عبد القادر.

قبضوا علىّ وخدونى على قسم الضاهر فى مكتب معاون المباحث منير محيسن ودا حيقى له معايا حكايات تانيه وجابو يوسف متعلق من رجله ونزلوا عليه ضرب بجنون بالخززان والشوم والكرابيج.. كانوا حوالى سته مخبرين ومنير بيه بيضربوا فيه بوحشيه علشان يعترف وهو بيئن من الألم وصرخت فى وش الظابط:

- بس.. كفايه يا كفره.. أناح اقول لكو على كل حاجه.

وفوجئت بيوسف بيقول لى:

- ليه كده الله يخرّب بيتك.



ثلاث سنين قضتهم فى سجن أرميدان بتهمه التزوير غيروا خط سيرى وقلبوا حياتى وخلقوا منى كائن جديد.. كائن إيجابى بقى له اهتمامات عامه تأثر بيها وأثر فيها فى حدود إمكانياته.

ثلاث سنين اكتشفت فيها الشاعر اللى أصبح بعد كده حديث الناس من المحيط للخليج أو فى أى مدينه أو قرية على كوكب الأرض فيها ناس بيتكلموا عربى.

